

ЮХАННОНИНГ ИККИНЧИ МАКТУБИ

Кириш

Мазкур мактуб муаллифи Исо Масихнинг шогирди Юҳаннодир. Юҳанно бу мактубини “Худо танлаган азиз хоним билан унинг болаларига” деб йўллаган бўлса-да, бу ерда у имонлилар жамоатини ва жамоат аъзоларини назарда тутган бўлса керак.

Муаллиф бу мактуби орқали имонлиларни бир-бирига меҳр-оқибатли бўлишга, Исо Масихга бўлган имонини маҳкам тутишга ва сохта пайғамбарлардан эҳтиёт бўлишга чақиради. Чунки бундай “пайғамбарлар” Масих*, яъни Худонинг Ўғли инсон бўлиб келмаган*, деб айтишган. Муаллиф имонли биродарларини тез орада кўриш истаги борлигини изҳор этиб, мактубини якунлайди.

Юҳаннонинг иккинчи мактуби жуда қисқа бўлгани учун бобларга бўлинмаган.

1-БОБ

Дуойи салом

¹Худо танлаб олган азиз хоним ва унинг болаларига* мен — оқсоқолдан* салом! Мен сизларни чин дилдан яхши кўраман, менгина эмас, ҳақиқатни билиб олганларнинг ҳаммаси сизларни яхши кўради. ²Бу севгига дилимиздан жой олган ва то абад биз билан бўладиган ҳақиқат асос бўлди.

³Биз ҳақиқат ва севги бўйича яшар эканмиз, Отамиз Худо ва Отамизнинг Ўғли Исо Масих берадиган иноят, марҳамат ва тинчлик бизга* доим ёр бўлади.

Ҳақиқат ва меҳр-муҳаббат

⁴Ҳурматли хоним, фарзандларингизнинг бир нечтаси Отамиз Худонинг бизга берган амрини* бажариб, ҳақиқат йўлида юраётган эканлар. Мен бундан ғоят хурсанд бўлдим.

⁵Сиздан бир илтимосим бор, бир-биримизни яхши кўрайлик. Сизга янги амрни ёзаётганим йўқ, бу амр бизга бошидан берилган. ⁶Севги — биз Худонинг амрларига амал қилишимиздан иборат. Сизлар бу амрни бошидан эшитгансизлар ва унга амал қилиб яшашингиз керак.

⁷Буларни ёдингизда тутинглар, чунки дунёда ёлғончилар кўпайиб кетган. Исо Масих инсон бўлиб келганини улар тан олмайдилар*. Уларнинг ҳар бири ёлғончи ва Масихнинг душманидир!* ⁸Шундай экан, огоҳ бўлинглар! Мукофотингизни тўлиқ олиш учун Масихга бўлган ҳақиқий имонингизни* маҳкам тутинглар.

⁹Масих таълимотини ортда қолдириб, ўзича “жадаллаб кетган” одамда Худо йўқ. Масих таълимоти бўйича яшаган одамда эса Ота ҳам, Ўғил ҳам бор. ¹⁰Агар бирор киши олдингизга келиб, сизларга бошқача таълимотни ўргатса, уни уйингизга киритманглар, таклиф ҳам қилманглар. ¹¹Агар уни таклиф қиладиган бўлсангиз, унинг ёмон ишларига шерик бўлган ҳисобланасиз.

Хайрлашув

¹²Сизларга айтадиган гапим кўп, аммо буларни сиёҳ билан қоғозга ёзишни истамадим. Ундан кўра, олдингизга бориб, сизлар билан юзма-юз гаплашаман, деб умид қиламан. Шунда шодлигимиз* тугал бўлади.

¹³Худо танлаб олган азиз синглингизнинг болалари* сизларга салом йўллашяпти*.

ИЗОҲЛАР

Масих — бу унвонни яҳудийлар келажакда уларни душманларидан қутқарадиган ва бутун ер юзидаги халқлар устидан ҳукмронлик қиладиган инсонга нисбатан ишлатганлар. Эски Аҳдда Масихнинг қиладиган ишлари ҳақида башоратлар ёзилган. Янги Аҳдга кўра Раббимиз Исо ўша Масихдир. Тўлиқроқ маълумотга эга бўлиш учун луғатдаги МАСИХ сўзига ва ХУДОНИНГ ЎҒЛИ иборасига қаранг.

...Худонинг Ўғли инсон бўлиб келмаган... — 1 Юҳанно 5:6 нинг биринчи изоҳига қаранг.

1:1 *Худо танлаб олган азиз хоним ва унинг болалари* — маълум бир имонлилар жамоати ва жамоат аъзолари назарда тутилган бўлса керак.

1:1 *оқсоқол* — яъни ҳаворий Юҳанно.

1:3 *Биз...биз* — юнонча матндан. Баъзи юнон қўлёзмаларида *Сизлар...сизлар*.

1:4 *Отамиз Худонинг бизга берган амри* — 1 Юҳанно 3:23 га қаранг.

1:7 *Исо Масих инсон бўлиб келганини улар тан олмайдилар* — 1 Юҳанно 2:22, 4:1-3 га ва 1 Юҳанно 5:6 нинг биринчи изоҳига қаранг. Яна 1 Юҳанно 4:10, 5:5 га қаранг.

1:7 *Масихнинг душмани* — 1 Юҳанно 2:18, 4:3 га қаранг.

1:8 *Масихга бўлган ҳақиқий имонингиз* — юнонча матндан сўзма-сўз таржимаси *биз бажарган иш*, бу ўринда уларнинг Исо Масихга бўлган имони назарда тутилган.

1:12 *шодлигимиз* — юнонча матндан. Баъзи юнон қўлёзмаларида *шодлигингиз*.

1:13 *Худо танлаб олган азиз синглингизнинг болалари* — бу ўринда имонлилар жамоати назарда тутилган бўлса керак. Айниқса, муаллиф қайси жамоатда бўлган бўлса, ўша жамоатга ишора бўлиши мумкин.

1:13 Юнонча матндан. Баъзи юнон қўлёзмаларида қуйидаги сўз оятга қўшимча қилинган: *омин*.